

Zirculara par geniturs nr. 1 - avust 2023

Stimos geniturs, stimadas parsùnas raspunsavlas par l'educaziùn

Jou sper ca Vus a la Vossa famiglia vegian passanto vacanzas da stad recreativas ad interessàntas. Sco adigna passa igl tains sco da sglar an da quels mumaints. Cun quella breav survagnez Vus las amprenas infurmaziùns pigl on da scola 2023/2024. Vus stgez bugent vagnir tier me cun amparadas near tgossas c'en betga cleras.

Cun ulteriuras breavs zircularas infurmesch jou Vus ear durànt igl on da scola sur da temas actuals, termins a novitads.

Nus salegragn sen egn on da scola interessànt a culturevel. An que sen giavisch jou a tut las scularas, igls sculars ad a las parsùnas d'instrucziùn egn'antscheata digl on da scola gartageada.



ABUNAMAIN AD URARI DA POSTA

Unfànts ca van cuagl bus a cun la posta survignan cun quella breav lur abunamaint. Scha quel va a pearder e'gl da pajear 5 fr. antocen 30 fr. par las spesas (dezisiùn da Postauto GR). Quels daners en da pajear directameing a la surmestra near agl surmester da classa. Igl urari da posta actual savez vus squitshear directameing da la nosssa pagina web → www.schulverband-schams.ch/transport.

FORMULARS

Mademameing sen la pagina web cataz Vus **dus formulars impurtànts**,

→ www.schulverband-schams.ch/HinweisefürEltern/Formulare

- formular par giavischs da congedi
- formular par restituziùns digls custs digl GA, etc..

Duvrad par plascher quels formulars pigls giavischs da congedi a par la dumonda da restituziùn. Graztga!

COMUNICAZIÙNS

Igls noss canals ufizials da comunicaziùn en breavs, mails a telefon. Scha vus lez comunitgear per Whats App, partartgead landervei dad ir anturn atentameing cun datas sensibilas. Quegl sche a la vossa raspunsavladad.

FURMAZIÙN

Durànt la furmaziùn obligatoria da las parsùnas d'instrucziùn e nigla scola. Igls unfànts vignan betga tgiros da la nosssa vart. Quels termins vignan comunitgieus bòld avunda.

EANDA DA SPORT AN LA NEV

Igl schaner â liac egn'eanda da sport an la nev par tut igls unfànts da scoleta a scola primara. Igl tains d'instrucziùn vean durànt quell'eanda betg ad easser durànt igl tains da bloc. Las infurmaziùns detagliadas survagnez Vus igl atun.

REGLAMAIN D`ABSAINZAS

Igl reglamaint d'absainzas digl SVS cataz Vus sen la pagina web. (Vean pigl mumaint surluvro!)

→ www.schulverband-schams.ch/GesetzlicheGrundlagen/ReglementeundKonzepte.

Là cataz vus ear la regulaziùn pigls gis da joker. Vus da sataner veda quellas indicaziùns par c'igl diever segi par nus ple sempel a par tuts madem. Graztga!

AMPREM GI DA SCOLA

Igl amprem gi da scola (exzepziùn scalem superiur Ziràn) antscheva da las uras sco inditgieu segl urari. An mintga liac da scola dat igl egna pintga «feasta d'avertura». Tut igls sculars a las scularas digl scalem superiur antschevan igl on da scola da las 07.45 uras an l'aula.

AGENDA

Amprem gi da scola: 14.08.2023
Vacànzas d'atun: 07.10. – 22.10.23
Eanda da sport an la nev: 08.01. – 12.01.24 (Preavis)

SURMESTERS A SURMESTRAS DA CLASSA

SCALEM SUPERIUR ZIRÀN

1. sec:	Nicolas Fontana	1. reala:	Joni Menn
2. scalem superiur:	Hannes Ineichen		
3. sec:	Marc Decurtins	3. reala:	Mathias Finger

SCOLETA A SCOLA PRIMARA ANDEER

Kiga: Annika Barandun
1./2. Kl.: Niklas Frei
3. Kl.: Nino Corti
4. Kl.: Ursina Conrad
5. Kl.: Andy Sommerau
6. Kl.: Christoph Würzler

SCOLETA ZIRÀN a SCOLA PRIMARA DONAT

Scoleta: Nicole Peng
1./2. Kl.: Gierina Michael
3./4. Kl.: Seraina Lony
5./6. Kl.: Bettina Nicca

NOVAS PARSÛNAS D'INSTRUCZIÛN

ZIRÀN

Nova parsùna d'instrucziùn par lungatgs easters



Hoi anzemel! Jou sund la **Maria Ida Baldeschi**, ve 33 ons a vigna da Priverno (datier da Roma). Igl proxim on da scola instruesch jou talian ad angles segl scalem superiur a Ziràn. Jou ve diploms an lungatgs easters ad igl master agl mieus lungatg-mama, igl talian. Avànt var 3 ons sund jou vagnida a viver anzemel cugl mieus grànd a careztgieu tgàn Apollo agl beal cantùn Grischùn, getg ple exact a Cuira. An la Svizra passaint jou igl mieus tains liber anzemel cun Apollo. Jou vont bugent a viandar, fetsch bugent sport, mo passaint ear bugent tains anzemel cugls meas amitgs par saravagnir. Jou s'angasch bugent par oters, p.ex. sco voluntaria da la Crusch Cotschna agl rom digl program da ratschever. Jou tratg ca la parsùna d'instrucziùn vegi egna rola impurtanta: Nus eassan qua par sustaner igl svilup parsunal da mintga scular a mintga sculara a betga me par intermediar savida digl fatg. Nus gidagn, sustanagn a promovagn igl potenzial digls noss sculars a da las nossas scularas. Jou ve marveglias tge ca spetga me a Ziràn a salegr da rimnar novas experientzgas.

ANDEER

Substituziùn pedagogica curative 1./2. classa igl on da scola 2023/2024



Igl mieus num e **Anja Kurath**. Jou ve 44 ons ad abitesch a Tgazes cugl mieus um ad igls noss dus unfànts. Carschida sei sund jou a Seglias. Suainter la scolaziùn sco surmestra primara ve jou luvro durànt plirs ons agl cantùn Turgovia a ve rimno experientschas an stanzas da scola cun pliras classas. Alura ve jou survagnieu igl desideri da viagear an tearas easters. Suainter igl segiurn agl easter ve jou instruieu igl zyclus 2 durànt prest endesch ons agl cantùn San Gagl. Avànt zaguànts ons sund jou turnada an la mia patria a ve sacumbargieu da mia famiglia. Igl mieus fegl a la mia feglia c'e naschida cun trisomia 21 – àn purto blear plascher an la mia veta, mo en ear egna sfida. Agl mieus tains liber fetsch jou sport, lig bugent cudeschs, s'angasch an ufezi d'anur, passaint tains cun mia famiglia a ve schiglioc projects. Sper egna substituziùn a Rodels, lavur jou igl proxim on l'amprem'eada sco pedagoga curativa an egn'amprema a savunda classa. Jou salegr sen quella leztga a sen l'instrucziùn cun Voss unfànts.

Schulverband Schams
Schulleitung
7432 Zillis
079 600 32 23
schulleitung@sv-schams.ch
www.schulverband-schams.ch

Substituziùn pedagoga curativa 4. classa antocen Nadal



Alegra anzemel... Igl mieus num e **Nadina Willi**, jou ve 36 ons a viv a Cuira. Jou sund dantànt gea 12 ons surmestra. Pigl mumaint fetsch jou la scolaziùn sco surmestra pigl scalem superiur. Sper igl studi instruesch jou parzialmeing agl scalem superiur da Tgazes ad igl proxim on da scola fetsch jou vetier antocen Nadal ad Andeer la substituziùn sco pedagoga curativa an la 4. classa. Ànc adigna acumpogn jou cun grànd plascher unfànts an diferaintas vigliadetgnas a cun diferaints basegns. Agl mieus tains liber sund jou activa agl sport, vont fetg bugent sen vieadis a giod igl equilibrer cun la lavur agl mieus iert da verdira plagn calurs. Ussa magna la mia veia puspe egn'eada ad Andeer an la scola primara a sen quegl salegr jou.

Sustegn an la scoleta Andeer, DaZ ziclus 1



Jou sund **Jutta Rüttger** a ve 50 ons. La mia scolaziùn sco surmestra par la scola elementara a pedagoga ve jou survagnieu a Unterfranken (DE). Davent igl davos marz viv jou a Spleia. Ad Andeer gid jou igl proxim on da scola sco mussadra a dund l'instruziùn da DaZ ziclus 1. Agl tains liber vont jou bugent a viandar. Plenavànt ve jou bugent lungatgs. Igl davos on da scola ve jou luvro sco substituta da la Larissa Dünner a ve savieu rimnar experienztagas sco pedagoga curativa an la 1./2.classa. Ussa salegr jou fetg sen las mias novas leztgas, da luvrar tier igls pintgs cun ritmica a da partgir igl plascher landervei.

DONAT

La surmestra da classa da la 3./4. classa a Donat



Tgears geniturs ... Jou ve plascher da stger comunitgear, ca jou – **Seraina Lony** – sund igl proxim on da scola la surmestra da classa da la 3./4. classa a Donat. Cugls meas 21 ons port jou energeia frestga a novas perspectivas a la stànta da scola. Bugent less jou partgir la mia motivaziùn cugls unfànts. Oriundameing vignet jou or da la Gidegna Bassa ad abitesch uss a Cuira. Igl mieus entusiassem par instruir a parschuedieu me da realisar igl mieus siemi da vagnir surmestra. Jou sund parschuedida ca mintg'unfànt a talents singulars, c'en da promover a da scuvrir. Agl mieus tains liber vont jou bugent cun skis a cun velo. Jou sund bugent an la natira par passantar novas aventuras. Ussa salegr jou da crear egn conturn d'amprender plagn tensiùn par Voss unfànt. An cass da dumondas stund jou bugent a disposiziùn.

Pedagoga curative a Donat



Bùn gi anzemel! Igl mieus num e **Cristiana Flütsch**. Jou viv a Masein a vignet a luvrar igl proxim on da scola an la scola da Donat sco pedagoga curativa an la promoziùn integrada. Jou lavur gea duple ca 20 ons sco surmestra a da quels durànt 16 ons sco pedagoga curativa an scolas. Igls davos 12 ons ve jou luvro pigl Schulheim Cuira an l'integraziùn d'unfànts cun basegns spezialas. Jou sund fetg bugent ordafora an la natira a vont bugent a viandar. Par me e igl bagnstar da la natira impurtànt a jou schazeg da ver egn tocet iert. Igl mieus tains liber passaint jou ear bugent cun liger a cun far lavurs a màn. An la mia lavur sco surmestra e par me bunameing igl ple impurtànt la relaziùn cugls sculars a las scularas, par c'igl setgi crescher egna cunfidanza a capientscha vizandevla. Mintg'unfànt e oter a va la sia atgna veia. Ign sto acumpagnear a promover el sen quella a quegl e interessànt a cumplanescha me.

Instrucziùn da rumàntsch par unfànts da lungatg tudestg an la scoleta Ziràn, gymnastica an la 1./2. classa a Donat



Bùn gi a tuts! Jou sund la **Victoria Buchli**, 35 ons, a viv a Scharons. Igl proxim on da scola turn jou par luvrar an la Val Schons, noua ca sund carschida sei. Suainter la mia scolaziùn ve jou luvro 2 ons an Gidegna sco mussadra. Ussa magn jou schon blears ons anzemel cugl mieus um egn bagn puril. Nus vagn 4 unfànts. Adigna puspe tgir jou dasperas unfànts sco mama digl gi. Davent la mia scolaziùn ve jou adigna instruieu 2-4 lecziùns l'eanda Sportkids near do gymnastica a la Jugi a ve visito diferaints curs par dar instrucziùn da sport. Jou lavur fetg bugent mintga gi cun ad an la natira. Igl mieus cor e plagn plascher scha se ir a samuantar ampo agl göld near agl iert. Jou salegr dantànt ear fetg da turnar agl mieus mastregn a sustaner durànt duas lecziùns l'eanda igls unfànts ca san betga rumàntsch an la scoleta da Ziràn. An las duas lecziùns instrucziùn sport an la 1./2. classa da la scola Donat se jou ear viver la mia passiùn pigl sport ad igl plascher ved igls unfànts.

DIRECZIÙN DA SCOLA SVS Mandara da scola



Stimos geniturs...Ear jou sund «nov» a tutezna betga gest tant. Igl mieus num e **Moni Thöny**. Jou viv cun la mia famiglia a Tgazes. Igl on 2002 ve jou fatg la scolaziùn sco surmestra primara a davent d'alura sund jou sen veia sen tut igls scalems, an tut igls tgomps ad an diferaintas scolas a ve ascheia savieu rimnar experiengtgas custevlas. Antras la lavur an la suprastàntza comunala da Tgazes, departamaint scolaziùn; presidenta digl cunzegl scola- sund jou stada buna da vurdar sen la scola or d'egn oter punct da vesta. Igl mieus tains d'ufezi feta igl dezember 23. Ussa salegr jou fetg da sustaner agl futur igl consorzi da scola Schons sco manadra da scola a da structurar las cundiziùns da rama d'egn on da scola. La stàntza da scola bandùn jou me cun egn pe, singulas uras sco pedagoga curativa a mintgatànt egn substituziùn mantegnan tgöld la mia capavladad d'instrucziùn. Jou salegr da tgapar a màn da maniera cumpetenta las sfidas a da duvrar la mia savida. Igl tains liber nizeg jou sco equilibrer tier igl mintgagi da scola. La famiglia, viagear, cantar, viandar, cuschinar, realisar novas ideias a da tutas sorts projects fan plascher a mei a portan variaziùn... Jou giavisch a Vus (ad a mei 😊) egn'antscheata da scola gartageada a blears beals mumaints.

Welcome back to school!